



Inatsisartunut ilaasortaq
Isak Johannessen, Naleraq

§37 naapertorlugu apeqquteqaat nr. 015/2025-mut akissuteqaat

Asasara Isak Johannessen,

Inatsisartut suleriaasissaanni § 37-mi imm. 1 naapertorlugu Naalakkersuisunut apeqquteqaammik nassiussisimavutit. Apeqqutit uannut akisassanngorlugit innersuussutigineqartut qujassutigaaqka. Apeqqutit issuarneqartarput tamatumalu kingorna akineqartarlutik.

Ulloq/ Dato: 13-02-2026
Suliap nr./Sagsnr.: 2026 - 2698
Allagaatip nr./Akt.: 26200146

Postboks 1160
Oqarasuaatip nr./Tlf.: 34 50 00
Fax: 34 55 05
3900 Nuuk
Email: pn@nanoq.gl
www.naalakkersuisut.gl

1. Upernavimmi napparsimaviup ulloq unnuarlu tamakkiisumik ingerlanissaa qulakkeerniarlugu Naalakkersuisut maannakkut qanoq iliuuseqapallanniarpat?

Akissut: Upernavimmi Peqqissaavik ulloq unnuarlu tamakkiisumik ingerlanneqartoq, Naalakkersuisut ilisimatitsissutigaat. Peqqissaavimmi aalajangersimasumik atorfillit arlallit ukiuni malittariaani sivilunerusumik sulisareerput, aammalu ulluinnarni aalaakkaasumik misilittagartoqalutillu ingerlatsisareersimallutik. Atorfiit sulisunit aalajangersimasumik inuttalersorneqanngitsut taartaasunik inuttaqartinneqarput.

Tamatuma saniatigut Naalakkersuisut Kalaallit Nunaanni Peqqinnissaqarfimmit naqqiissut 23. septembari 2025-meersoq innersuussutigaat, tassani ersarissumik allassimasoqarmat innuttaasut tamarmik – aamma nunaqarfiit avinngarusimasuniittut – ulloq unnuarlu peqqinnissaqarfimmut periarfissaqartut.

Inuiaqatigiit aammalu innuttaasut pisariaqartitaat piffissap ingerlanerani allanngorarnarat Naalakkersuisunit akuersarneqarpoq. Taamaammat peqqinnissaqarfiup neqeroorutai ingerlaavartumik naleqqussarneqartassapput – innuttaasunik peqataatitsisoqartassalluni, taamaasillutik toqqissisimallutillu ilisimatinneqarluartartutut misigisimaniassammata. Taamaammat Inatsisartuni partiit peqatigalugit peqqissutsimut tunngatillugu isumaqatigiissusiornissamut piareersarnerit pileruttarput.

2. Naalakkersuisut qanittukut ungasinnerusukkullu nakorsat, peqqissaasut peqqinnissaqarfimmilu sulisut allat atorfinitsinneqarnissaat sulisoriinnarnissaallu qanoq qulakkeerniassavaat?

Akissut: Kalaallit Nunaat, nunat avannarliit allatulli, peqqinnissaqarfimmi sulisussanik immikkut ilinniagalinnik atorfinitsitsiniarnermi annertuumik unammilligassaqarluni misigisaqarpoq. Tamanna peqqinnissaqarfiup ilisimaneqarluartumik nassuiaatigineqarluartumillu unammilligassaraa.

Upernavimmi paarlataanissamut annertuumik soqutiginnittoqartartoq, aammalu siusinnerusukkut kingoraartaasimasut akuttuallaanngitsumik uteqqiattartuusut, Naalakkersuisut ilisimatitsissutigaat. Tamatuma saniatigut ilisimatitsissutigissavarput, Peqqinnissaqarfik danskit napparsimmaviinik nikittaalluni sulisarnernik aaqqissuussamik isumaqatigiissuteqarmat, tamatumani atorfinitsitsiniarnermi ajornartorsiut qaangerniarlugu nakorsanik peqqissaasunillu piffissami sivikinnerusumi sivisunerusumiluunniit atorfinitsitsisoqartarluni.

Naalakkersuisut danskillu nunamut namminermut peqqissutsimullu ministereqarfiat peqqinnissaqarfiup atorfinitsitsiniarnermut suliniutaanik tapersersuinissaq siunertarlugu Danmarkimi nunat immikkoortuisa peqqinnissaqarfiini sulisut nikittaallutik nunatsinni suliaortarnissaannut aaqqiissuteqartoqartarnissaa pillugu aamma isumaqatigiissuteqarput. Kalaallit Nunaata imminut napatinnissaa pillugu tunngaviusumik isumaqatigiissutip ilaa 16. septembri 2025-meersoq isumaqatigiissutip malitsigisaanik peqqissutsimut suliniutit pillugit isumaqatigiissutip ilaanit aningaasaliissutit atulersinneqarput. Taamatuttaaq Naalakkersuisut tusagassiorfinnut nalunaarutaat 9. februaari 2026-meersut innersuussutigineqarput: "Ataatsimut peqqissuseq ataatsimut akisussaaffiusoq - Kalaallit Nunaanni peqqissutsimut pitsanngorsaasussamik isumaqatigiissutip immikkoortuanik isumaqatigiissuteqarneq" aamma "Danmarkimi naalakkersuisut aamma nunatsinni Naalakkersuisut peqqissutsimut sanaartugassanullu tunngatillugu suliniutit pillugit isumaqatigiissuteqarput".

3. Kiffartuussinerup ajorseriaqqinninnissaa suliassalluunniit pingaarutillit unitsinneqarnissaat pinngitsoortinniarlugu Naalakkersuisut immikkut aningaasaliissuteqarniarpat?

Akissut: Upernavimmi Peqqissaavimmi pingaarutilinnik sullissiviit matuneqarsimanngitsut aammalu sullissinermut ajornerulersitsisoqarsimanngitsaq, Naalakkersuisut ilisimatitsissutigaat.

Taamaammat Naalakkersuisut tusagassiorfinnut nalunaarutaat 9. februaari 2026-meersut innersuussutigineqarput, taakkunani ersersinneqarmat peqqinnissaqarfisinnut aningaasaliissutit ilaqqinneqarsimasut.

4. Naalakkersuisut qanoq qulakkeerniarpaat nunaqarfiit qulingiluat eqqissisimasumik piffissarlu eqqorlugu nakorsiarsinnaanissaat?

Akissut: Peqqinnissaqarfiup qitiusumik immikkoortuini sullissineq pillugu allakkiaa 2015-meersoq Upernaviup peqqissaaviani aammalu inoqarfiini qanittuaniittuni sullissinermi malinneqarpoq. Inoqarfiit minnerusut – soorlu ullumikkut taamaattoq – siornatigutulli sullissinermut katsorsaanermullu periarfissaqarput. Sulinnigiffeqarnerup nalaani napparsimasoqarneranilu sulisoqarniarneq unammillernarsinnaasarpog. Taamatuttaaq ulluinnarni

ingerlatsineq piffissat ilaanni timmisartuussisarnerup kinguaattooqattaarneranik eqqugaasinnaasarpoq.

Ingerlaavartumik nakorsiartoqarsinnaanissaanik periarfissaqarnissaq qulakkeerniarlugu, qarasaasiakkut nakorsiartitsisarnerup annertusarneqarnissaa Peqqinnissaqarfiup immikkut ukkatarivaa. Qarasaasiakkut nakorsiartitsisarnerni naammattumik nakorsaqaarnissaanut suleqatigiinnik pilersitsinissaq ilutigalugu, 2024-imi politikikkut aningaasaliissutit ilaneqarput.

- 5. Naalakkersuisut neriorsuuteqassappat napparsimavik ulloq unnuarlu napparsimaviinnaanngitsoq ulluinnarni (8-16) ammasoq, kisiannili ulloq unnuarlu peqqinnissaqarfimmik ajoqusersimasut uninngaviannik peqartoq, ingerlaannassasoq.**

Akissut: Upernaviup Peqqissaaviata ammasarfii sivikillineqalersaanngillat. Peqqissaaviup ulloq unnuarlu, ajoqusersimasunut nakorsiartarfik ilanngullugu, katsorsaavittut atuuffeqarnissaa sulii ersarissumik pingaartinneqarpoq.

Inuulluaqqusillunga



Anna Wangenheim